

'Fluba tede nen Pɔl -a cren -te

Timote

le

1 ¹An 'bɔ Pɔl 'bɛ 'fluba 'gʋɛ -a cren -te. An ya Zozi Crizi -le 'pasiazan -a. Bali nen -kaa 'sizan 'wɪ 'ji -a bɛ, 'o 'vale Zozi Crizi nen -kaa 'bli a -yrɛ 'bɛ, -wɛɛ 'an drɛ 'a. ²Mɛɛn 'fluba 'gʋɛ -a cren -te 'i 'bɔ Timote le. Mɛɛn Bali -le 'wɪ 'vɪ 'yɪɛ, ɛn i wu 'man. -Yee "wɛan i drɛ "le 'an 'pɔn -ji 'nen -le 'wɪ 'zʋ.

-Kaa "tɪ Bali 'lee -kaa san Zozi Crizi 'wei nyrinda 'si, ɛn 'o 'wee "yi 'lee 'wee -fʊdɪ -trɔɔ -nɔn 'yɪɛ!

'I drɛ "yi minnun nen o Bali -le 'wɪ "paaman 'wlu 'a bɛ o va!

³'Wɪ nen maan 'vɪ 'yɪɛ te an "ta Masedɔa si 'siala bɛ, -a -cin 'e 'fɔla 'i 'ji. Maan 'vɪ 'yɪɛ 'nan, 'i 'fʊ Efɛz nun, 'nan -e 'i 'wɪ 'pla min -mienun le. O ya 'ka yei, te o 'wɪ nen 'wlu 'a bɛ -a "paaman minnun -ji. ⁴'Wɪnun zɪɛ, polunun nen Zuif 'nɔn -a bo bɛ 'lee o tranun kludanɔn 'nrɔndɪ nen o -ko -a 'padɪ -a "da "bɛ, -a 'bɔ nen. 'I vɪ -wɛɛ 'nan 'o 'le 'tɔ! Kɔɔ 'wɪnun zɪɛ o -taala -sa -fɔdɪnɪn -a. 'Nyrannan nen Bali -a "paa min man 'lɔɔ -e 'e min 'si 'wɪ 'ji bɛ, ya'a 'sia 'wɪnun zɪɛ -a va "fo "dɪ, 'pian e "sia yi -teradɪ Zozi da va. ⁵Bali -le 'wɪ "paadɪ 'le 'srannan "nen 'nan yɪdɪ "yi 'e 'kɔn 'ka yei. ɛn yɪdɪ "yi zɪɛ 'ka drɛ 'ka 'ci 'fɪdaa 'a! Te 'ka 'wɪ drɛ te 'ka 'wulo -ji 'nrɔndɪ tin -tɛa 'ka da dɪ! ɛn yɪdɪ "yi zɪɛ, e 'si yi -teradɪ Zozi da nen e 'ka "ta lou 'e "tun "dɪɛ -a va.

⁶'Wɪnun zɪɛ "o 'ka wo 'bɛ drenan "fo "dɪ, 'pian 'o 'fli -nɔn 'wɪnun nen o ya 'wɪ "tun "a bɛ -a vɪdɪ le. ⁷O 'fli 'siala 'nan Bali -le -pei -tɔ wɪnun bɛ -wɛɛ cɪ -a "paanɔn 'a. 'Pian 'wɪnun nen waa ve bɛ wa'a ci 'tɔa dɪ, ɛn 'wɪ 'bɔ nen o ya o -tɔdɪ "da 'nan 'wɪ 'kpa nen bɛ, wa'a 'tɔa dɪ.

⁸-Kaa -tɔa 'nan -pei -tɔ wɪnun bɛ, e ya 'wɪ "yi "a, 'pian e ya 'nan min 'e 'ta wula "da 'e -si tɪglɪ da. ⁹ɛn -a -cin 'e 'kɔn -kaa 'ji 'nan, minnun nen

o ci tigl be -wee "wean "cɛɛ -pei -tɔ wɪnun a dɪ, 'pian minnun nen o 'ka 'kpa dɛ, -wee "wean nɛn. 'Wɪnun nen waa dra be -nyren: O yie 'ka 'naan Bali man dɪ, ɛn o 'wɪ 'wɪdɪ 'tɔ 'tɔdɔ pɛɛnɔn dra. O 'tɔ sɔɔman Bali man, ɛn fɛnun nen Bali -le vɛ -a bɛ, o "we "man -wɪdɪ. Min -tɛnɔn nen waa, 'o "tɪ 'lee 'o "bɔ -tɛa. ¹⁰Minnun zɪɛ o nyianla lɪ 'lee -kɔnnɛn -a te wa'a 'o cin 'pale dɪ. ɛn -klɔnmɔn 'lee 'e bɔɛzan -klɔnmɔn nyianla. ɛn 'o bɔɛzan blamin -taan "nɔan -a. ɛn o 'wɪ -sɛan. ɛn o -pɛ wɪuannan 'wɪ 'ji, te e ya 'wɪ -a. ɛn o 'wɪ dra te e 'ka Bali -le 'wɪ "paadu da dɪ. Minnun pɛɛnɔn nen o 'wɪnun zɪɛ -a -tɔ dra bɛ, -wee "wean nɛn -pei -tɔ wɪnun a. ¹¹Bali nɛn -a 'tɔ a -dan, ɛn -a va nɛn -fɛa pɛɛnɔn "sia bɛ, -yɛɛ Zozi 'le 'wɪ 'nɔnnɔn 'pɛba 'wɪ 'an 'lɔ. 'Wɪnun nen an "sia -a vɪnan 'yie 'gɛɛ -a da wɪ nɛn.

Pɔl Bali muo "fɔ "yi "nɛn yaa dre -yɛ "bɛ -a man

¹²Zozi Crizi nɛn -kaa san -a bɛ, maan muo -fɔa. E yi -tera 'an da, ɛn yaan 'si "va 'nan -e 'an 'yee 'nyranman 'pa, ɛn yaa ta "koe "nɔn 'mɛn. ¹³'E tɛdɛ bɛ, an wɪ Zozi 'bɔ man -wɪdɪ, ɛn an 'tɛ 'pa Zozinɔn da, te an -kuli -taan "o man. 'Pian 'an nyrinda -sɛn Bali da. Tɔ zɪɛ -a man bɛ te ma'an yi teala Zozi da dɪ, ɛn 'wɪnun nen maan dra bɛ, ma'an -ci tɔa dɪ, -yɛɛ "wean 'an nyrinda -sɛn Bali da. ¹⁴'Wɪ 'kpa, Zozi nɛn -kaa san -a bɛ, e "yi dre 'mɛn, ɛn yaa dre e "mlianla "da. Yɪdɪ "yi "nɛn e "sia -a 'bɔ 'va bɛ, 'lee yi -tɛradɪ Zozi da bɛ -yɛɛ paa 'an 'ji.

¹⁵Zozi Crizi -ta 'treda 'nan, -e 'e 'wɪ 'wɪdɪ 'dɛnɔn 'si 'wɪ 'ji. 'Wɪ zɪɛ 'wɪ tigl nɛn. E ya "le min 'e yi -tera "da "fɔ. 'I 'ci "nrɔn 'mɛn 'wɪ da. An 'wɪ 'wɪdɪ dre 'e mlinla "da, ¹⁶'pian 'an nyrinda -sɛn Bali da. Yaa dre 'an 'bɔ 'wɪ 'wɪdɪ "dɛzan -dan 'gɛɛ 'an 'va, kɔɔ e ya "vale 'nan, blamin 'e -ci yɪ 'nan Zozi Crizi 'le man -srandɪ min va a -dan. ɛn Bali 'wɪ zɪɛ -a dre 'nan, -e minnun nen o -taa "yi -tɛlɛa Zozi da -e 'o 'belidɪ nɛn ya'a 'nyaan dɛ -a yɪ bɛ, 'an dre -wee 'wɪ -kɔn "manve -a. ¹⁷Bali a mingɔnnɛn -a 'li 'trilii, ya'a 'kaa "fo "dɪ. Min 'ka -a ye 'e yie 'a dɪ. -Yɛɛ cɪ Bali -a 'e -tɔwɪ, fɛ pee 'ka "nyian -yɛɛ -sru "dɪ. 'Tɔ 'wɪdɪ 'e 'kɔn -yɛɛ vɛ -a, ɛn 'tɔ -dan 'e 'kɔn -yɛɛ vɛ -a 'li 'trilii. Amen!

Pɔl Timote "koe "tɔ 'e da

¹⁸Timote, 'wɪ nɛn maan 'vɪ paan 'yie bɛ, 'mɛn 'nɛn 'kpa, 'bɛ 'nɛn 'gɛɛ maan -pɛba wo 'i 'lɔ. 'An 'ci "nrɔn 'wɪ nɛn Bali 'lewei vɪnɔn -a 'vɪ 'i man bɛ -a da, ɛn maan dre. 'O wei zɪɛ -a 'bɔ nɛn 'e dre 'i 'tɔ -kli -a, -e 'i Minsan -le 'nyranman 'pa. E ya "le -kuli man nɛn i cɪ. ¹⁹'Yie yi -tɛradɪ Zozi da bɛ 'i "trɔɛn "trɔa ji, ɛn te 'i 'wɪ dre te 'i 'wɪlo -ji "nrɔndɪ tin -tɛa 'i da dɪ! Min -mienun bɛ 'wɪ "yi "nɛn o -wɪlo -ji "nrɔndɪ -a vɛ -wɛ 'nan 'o dre bɛ, wa'a 'ta wɛlɛa 'bɛ da dɪ. 'Wɪ zɪɛ -yɛɛ -maan ɛn -wee yi -tɛradɪ Zozi da 'e 'le 'tɔ. ²⁰ɛn 'wɪ 'bɔ zɪɛ -yɛɛ 'bɔ Ime 'lee Alɛzandre man. 'O "fli zɪɛ an 'o dre Satan -le vɛ -a 'e "pa 'ji, kɔɔ maan 'vɪ -wɛ 'nan, te 'o 'ta "nyian 'ku yei "dɪ. Maan dre zɪɛ -e 'o -tɔ 'nan, Bali 'tɔ sɛrdɪ bɛ e 'ka "yi "dɪ.

Pɔl Bali tru 'badu 'wɪ 'vɪ

2 ¹An 'ka tru "baa, 'wɪ nɛn e cɪ "le 'ka drɛ ɛn -yɛɛ cɪ 'wɪ 'tɛdɛ -a bɛ, -nyrɛn 'nan, 'ka Bali tru 'ba minnɛn pɛɛnɔn lɛ! 'Wɪ nɛn o man bɛ 'ka tin 'ba Bali lɛ, ɛn 'ka Bali muo "fɔ! ²'Ka Bali tru 'ba minnɛn nɛn mingɔnnɛnnɛn -a bɛ -wɛlɛ, 'lɛɛ minnɛn nɛn min tanɔn 'a bɛ -wɛlɛ. 'Ka drɛ zɪɛ -e -kaa man 'e 'fɔla flu te "pɛn 'ka -kaa man dɪ. -A -nan nɛn -kaa -kɔlaman Bali 'sɔdɪ -a, ɛn -cɛɛ ta wɔdɪ minnɛn va bɛ e -kɔɔn 'e 'sɔdɪ 'ji. ³'Wɪ zɪɛ -yɛɛ cɪ 'wɪ 'yi "a, ɛn e 'sɔ Bali nɛn -kaa 'sɪzɛn 'wɪ 'ji -a bɛ -yrɛ. ⁴Bali -a "va 'nan minnɛn pɛɛnɔn 'o 'si 'wɪ 'ji, ɛn 'o 'yɛɛ 'wɪ tɪglɪ 'tɔ. ⁵Kɔɔ -yɛɛ cɪ Bali -a 'e -tuwɪli, -a pɛɛ "ka "dɪ. ɛn min nɛn e cɪ Bali 'lɛɛ minnɛn yɛi "bɛ, e ya "nyɪan 'e -tuwɪli. -A pɛɛ "ka "dɪ. Min zɪɛ Zozi Crɪzi nɛn. ⁶E wɪ "man, ɛn e minnɛn pɛɛnɔn 'lɛji -ka 'wɪ. O ta pan nɛn yaa 'wɪ. 'Wɪ nɛn yaa drɛ zɪɛ, -yɛɛ -cɪ kɔɔn 'nan Bali a "va 'nan minnɛn pɛɛnɔn 'o 'si 'wɪ 'ji. Tu nɛn Bali -a -kɔɔn bɛ -a tɔ 'bɔ man nɛn 'wɪ zɪɛ 'e drɛ. ⁷Bali 'an drɛ Zozi 'lɛ 'pasɪazɛn -a, 'nan -e 'an 'wɪ zɪɛ -a fuɪla "man minnɛn pɛɛnɔn 'va. 'Wɪ tɪglɪ nɛn maan vɛ, 'wɪlu "cɛɛ maan -sɛan "fo "dɪ. Yaa drɛ zɪɛ 'nan -e 'an yɪ -tɛradɪ Zozi da 'lɛɛ Bali 'bɔ 'lɛ 'wɪ tɪglɪ bɛ, -a "paa minnɛn nɛn o 'ka Zuɪf 'nɔn 'a dɪɛ o ji.

⁸An ya "va 'nan fɛ pɛɛnɔn 'nan bɛ -klɔnɔmɔnnɛn 'o Bali tru 'ba. O -pɛnɛn nɛn waa wuanla lou Bali tru 'banan bɛ, 'o 'kɔn 'saun. Te min man nyran 'e 'kɔn o ji dɪ, ɛn te -sa -fɔdɪ 'e 'kɔn o yɛi "dɪ!

⁹Lumɔnnɛn -lɛ vɛ bɛ, an ya "va 'nan, 'o sɔ 'cɛn 'o man 'kpa. 'O 'man drɛ 'e tɪglɪ da, te 'o 'fli -fɔ bei -klɔnɔmɔn 'lɛ -wɛɛladɪ -a dɪ. -Nyɪɛn "lɛ -wulo "jɛ "drɛdɪ sɛnjɛn sɛnjɛn 'lɛ 'wɪ 'zɔ, ɛn "nyɪan "lɛ -sɪga fɛnɛn 'lɛɛ 'kɪlanvɛnɛn -sɛndɪ o man -lɛ 'wɪ 'zɔ, ɛn "nyɪan "lɛ sɔnɛn nɛn -a 'flɛ cɪ bɛ -a wɔdɪ -lɛ 'wɪ 'zɔ. ¹⁰'Pɪan -wɛɛ fɛnyɪan 'e 'si o drɛ wɪnɛn 'yi 'va. 'Wɪ zɪɛ -a drɛdɪ 'bɛ -kɔɔnman 'nan o "kɪlanman Bali lɔ.

¹¹-Te min a Bali -lɛ 'wɪ "paanan bɛ, lumɔnnɛn ta 'e 'kɔnnan flu, te o "trɔɛn "a 'e 'tɔdɪ -a wɛi lɛ, ɛn 'o 'ta wɪla "da! ¹²ɛn "nyɪan bɛ, ma'an -sɪ -nɔan lumɔnnɛn lɛ, -e 'o Bali -lɛ 'wɪ "paa dɪ. ɛn ma'an -sɪ -nɔan -wɛlɛ, -e 'o -klɔnɔmɔnnɛn 'plɛ dɪ, 'pɪan o 'ta 'e 'kɔnnan flu. ¹³'Ka 'ci 'nrɔn 'wɪ nɛn e drɛ 'li 'trɛda pou sɪanan "bɛ -a da: Adan nɛn Bali -a drɛ 'e tɛdɛ, "bɛ -sru ɛn e ɛv drɛ. ¹⁴Adan "cɛɛ -mlɛn -a sɛɛ paa dɪ, 'pɪan lumɔn nɛn ɛv -a bɛ, -a 'bɔ nɛn -mlɛn -a sɛɛ paa, ɛn -pɛi nɛn Bali -a -tɔ -wɛlɛ "bɛ, yaa sɛɛ. ¹⁵'Bɛ a zɪ, 'pɪan maan vɛ 'cɛɛ 'nan, Bali lumɔn 'sɪa 'wɪ 'ji 'nɛn 'yadɪ man. 'Pɪan e ya 'nan 'e yɪ -tɛra Zozi da -trɪlii, ɛn 'e min yɪ "yi -trɪlii, ɛn 'e 'kɔn Bali -lɛ vɛ -a "fo, ɛn 'e 'wɪ pɛɛnɔn zɪɛ -a drɛ -pɛ nɛn e "sɔa Bali lɛ bɛ -a man.

Minnɛn nɛn 'o yɪɛ -tɔa -leglɪzi -va bɛ -wɛɛ 'wɪ

3 ¹-Te min a "va 'nan 'e yɪɛ -tɔa -leglɪzi -va bɛ, te 'wɪ "yi "nɛn yaa -sɪ 'sɪa. 'Wɪ zɪɛ e ya 'wɪ tɪglɪ 'a "fo.

²Pian e ya 'nan, min nen e yie -tɔa -leglizi -va be, te tɔ 'tɔ 'e 'kɔn 'e 'padɪ "man "dɪ. Lɪ -kɔan -a san wlu -tɔwli. -A san -kɔlaman 'e 'fli 'kundɪ -a, en -a san 'e 'kɔn min tɪglɪ 'a, en -a san dre wɪ 'e 'kɔn 'e 'sɔdɪ "ji. -A san 'e 'kɔn min nen e min "kuan 'e 'pɛ "fli "a be -a. -A san 'e 'kɔn min nen e Bali -le 'wɪ "paaman sidɔ be -a. ³Te -a san 'e -wen mlindɪ -trɔa 'e 'win -ji dɪ, te 'bli 'e 'fɔ -a san ji tada dɪ, 'pian -a san 'e 'kɔn min -trɔɔ -a. Te -a san 'e 'wɪ 'blɪdɪ yɪ "yi "dɪ, en te -a san 'e 'kɔn min nen e "lala ye "yi "bɔv "be -a dɪ. ⁴-A san 'e 'kɔn min nen -a -pɛ "sɔa 'e 'bɔ 'le "kɔnɛn 'nɔn 'pladɪ -a be -a. -A san -le 'nennun be o yie 'e 'nan -a 'bɔ man, en 'o 'yra -te min man. ⁵Kɔɔ -te min -pɛ 'ka 'sɔa 'e 'bɔ 'le "kɔnɛn 'nɔn 'pladɪ -a dɪɛ, yaa dra 'kɔ -e 'e yie 'tɔ Bali -le -leglizi be -a va? ⁶Te -a san 'e 'kɔn min nen e -fɔ Zozi 'va 'e 'tre be -a dɪ, "tɔgɔ 'e 'fli 'sia -dan, -e Bali 'e tin -tɛ "da "le zɪ yaa dre Satan lɛ be -yee 'wɪ 'zɔ. ⁷En e ya "nyian 'nan, minnun nen o 'ka Zozi 'va dɪɛ -a san 'tɔ "yi 'e 'kɔn 'o 'le. -Te e ya zɪɛ, minnun 'ka 'we "man -wɪdɪ "dɪ, en Satan 'ka 'kɔlaman -a man yɪdɪ -a dɪ.

Minnun nen o "paa -leglizi 'lɛnɔn 'va be

⁸Minnun nen o "paa -leglizi 'lɛnɔn 'va be 'wɪ 'tɔwli zɪɛ e ya -wee vɛ -a. 'O 'kɔn minnun nen o dre wɪ -a -maan min 'yra -tɛa "o man be waa. En te 'o 'kɔn minnun nen 'o wei a "flivli "be -a dɪ, en te 'o 'fli -nɔn -wen mlindɪ lɛ dɪ, en te 'o -dawli yɪ "yi "lala -nan dɪ. ⁹Wɪ yɔɔdɪ nen -cee yi -teradɪ Zozi da -a be 'o "trɔɛn "trɔa ji, te 'o 'wɪ dre te 'o 'wulo -ji "nrɔndɪ tin -tɛa "o da dɪ! ¹⁰'Ka cin yɪ -wee 'wɪ man, -te ka'a 'wɪ 'tɔ yɪlɛ o man dɪɛ, 'vaa -e 'ka o dre -leglizi 'lɛnɔn 'pa "vanɔn 'a.

¹¹-Te lumɔnnun nen waa be, -a -tɔwli "nen "nyian -wee vɛ -a. 'O 'kɔn lumɔnnun nen 'o dre wɪ -a -maan min 'yra -tɛa "o man be waa. Te 'o 'kɔn lumɔnnun nen 'o 'le 'ble be -a dɪ. 'O 'kɔn lumɔnnun nen 'o 'kɔlaman 'o 'fli 'kundɪ -a be waa. 'O 'kɔn lumɔnnun nen min yi -teala o da 'wɪ pɛɛnɔn 'ji be waa.

¹²Minnun nen o ya -leglizi 'lɛnɔn 'pa "vanɔn 'a be, lɪ -kɔan -wɔ "tɔwli, en o -pɛ "sɔa 'wee 'nennun 'lee 'wee "kɔnɛn 'nɔn 'pladɪ -a. ¹³-Leglizi 'lɛnɔn 'pa "vanɔn be, -te o -pɛ "sɔa 'wee 'nyranman 'padɪ -a 'kpa be, Zozinɔn 'yra -tɛa "o man. -A -nan nen o yi -teala 'o 'fli da -e 'o yi -teradɪ Zozi Crizi da -nan wɪ vɪ minnun lɛ.

Zozi Crizi -le 'wɪ 'nɔnɔn be Bali -le 'wɪ yɔɔdɪ -dan nen

¹⁴-A -cin a 'an 'ji 'nan yi "fli yaa 'gɔvɛ -a -ji be, 'an bɔa 'i man nun, 'pian 'an ya 'fluba 'gɔvɛ -a cɛn -tenan 'yie, ¹⁵'nan -te 'an 'mɔn te yi'an ye dɪɛ, tɔɔn zɪ 'kɔ 'i 'wɪ dre Bali -le 'kuin be, te yia -tɔa. Bali nen -a yie cɪ "man "be, -yee -leglizi nen. -Yɛɛ cɪ 'wɪ tɪglɪ 'kɔladɛn 'a, en -yɛɛ cɪ -a cɛin -a. ¹⁶'Wɪ 'kpa nen, -kaa pɛɛnɔn pei a -tɔwli 'nan, 'wɪ yɔɔdɪ nen -cee yi -teradɪ Zozi da -a be e ya -dan.

-Nyren 'nan Zozi dre blamin -a,
 en Bali lei 'saun -a -ci koon 'nan
 ya'a 'wɪ 'wɪdɪ -tuwli "drele dɪ.
 Bali -le 'pasianon -a 'yɪ.
 'Wɪ nɛn Zozi -a dre bɛ,
 waa -nan 'sinan 'pa
 'lɛglɔn pɛɛnɔn 'ji 'nɔn lɛ,
 en minnun yi -tera "da.
 Bali 'tɔ -dan -nɔn -yɛ laji lou.

Minnun nen o 'wlu wɪ "paaman minnun ji bɛ, 'i o -ci bɔla

4 ¹Bali lei 'saun -a 'vɪ 'wein 'nan, tɔ -fɔla "da "ji bɛ minnun 'ka 'taa
 yi -teleɔ 'wɪ nɛn Bali -a 'vɪ bɛ -a da dɪ. O -taa -sɔɔnleɔ min see "paa
 wɪnun -sru 'lee 'wɪ "paadt nɛn lei -wɪdɪ -a -cin -tɔɔ "min ji bɛ -a -sru.
²Minnun nen o 'wɪ 'bɔ zɪɛ -a "paaman bɛ, 'wɪnɔn nɛn waa, ɛn o ya 'o 'fli
 'tɔ -wɛɛnan. -Wee -wulo -ji "nrɔndɪ va bɛ Satan -pɛ -fle yɛra 'nan. ³Waa
 "paaman minnun ji 'nan, te lɔmɔn 'e -kɔnnɛn 'pa dɪ, ɛn te -klɔnmɔn 'e lɪ
 'pa dɪ! ɛn "nyian 'nan -blɪfɛ -mie a bɛ, te min 'e 'bɛ 'blɪ dɪ! 'Pian Bali -blɪfɛ
 pɛɛnɔn dre 'nan -e minnun nen o yi -tera Zozi da ɛn o 'wɪ tɪglɪ -tɔɔ "bɛ, 'o
 Bali muo "fɔ -e 'o -blɪ. ⁴Kɔɔ fɛ pɛɛnɔn nɛn Bali -a dre -blɪfɛ -a bɛ e ya 'kpa,
 ɛn -a -tɔ 'ka "va -wɪdɪ "fo "dɪ. 'Pian e ya 'nan min 'e Bali muo "fɔ -e 'e -blɪ.
⁵Kɔɔ 'wɪ nɛn Bali -a 'vɪ bɛ -a da, 'lee Bali 'bɔ tru 'badɪ man nɛn, fɛ pɛɛnɔn
 zɪɛ e dra 'saun Bali lɛ.

⁶-Te 'wɪnun zɪɛ -a 'bɔ nɛn i cɪ -a "paanan Zozinɔn 'ji bɛ, te i ya Zozi
 Crizi -le 'nyranman 'pazan 'kpa -a. ɛn yaa -kɔɔnman 'nan Bali wei 'lee 'wɪ
 "paadt tɪglɪ nɛn i kɔala "man "bɛ, -wɛɛ cɪ "le 'yie -blɪfɛ -le 'wɪ 'zɔ. ⁷'Pian
 'wɪnun nɛn e 'ka Bali -le 'wɪ 'a dɪ ɛn e ya "le lɪblanun -le polu "tun 'zɔ bɛ,
 te 'yie 'si -nɔn min lɛ "fo "dɪ!

'I man -wɛɛ 'nan 'i dre wɪ 'e 'sɔ Bali lɛ. ⁸-A man -wɛɛdɪ 'nan -e fɛ -tɔ 'e
 -trɔɔ min 'kɔle 'a bɛ, e ya 'kpa, 'pian e "paa min va "wɛnnɔn 'e "tun. 'Bɛ
 nɛn 'bɛ cɪ 'wɪ "yi "a "fo "bɛ, -nyren 'nan min 'e 'ta wɔla Bali wei da. -Te
 -kaa ya 'wɪ zɪɛ -a drenan bɛ, Bali -le -fɛa a -kaa man tɔ 'gɔvɛ -a -ji, ɛn e ya
 -kaa man tɔ -fɔla "da "ji.

⁹'Wɪ zɪɛ e ya 'wɪ tɪglɪ 'a, ɛn e ya "le -e min 'e yi -tera "da. ¹⁰ɛn 'nyian
 'wɪ zɪɛ -a lɛ nɛn -kaa 'nyranman "paa, ɛn -kaa 'fli -mɛan dra, kɔɔ Bali nɛn
 -a yie a "man "bɛ, -kaa 'bli a -yɛɛ. -Yɛɛ cɪ 'trɛdanɔn pɛɛnɔn 'sizan 'wɪ 'ji -a.
 'Pian minnun nen o yi -tera Zozi da bɛ, o nɛn e o "sia 'wɪ 'ji.

¹¹'Wɪnun pɛɛnɔn zɪɛ, -a 'bɔ nɛn 'i "paa Zozinɔn 'ji, ɛn -a 'bɔ nɛn 'i 'pla
 -wɛ 'wɪ 'a. ¹²Te min -tɔ 'e vɪ 'nan, i ya -gobo 'a -le "wɛan bɛ 'e yie 'ka 'naan
 i man dɪ. 'Pian 'i dre Zozinɔn pɛɛnɔn 'le 'wɪ -kɔɔnmanzan 'a 'yie 'wɪ vɪdɪ
 man, 'lee 'yie 'wɪ drɛdɪ min va man, 'lee 'yie min yɪdɪ "yi "man, 'lee 'yie yi
 -teradɪ Zozi da man, ɛn 'wɪ nɛn e 'tɔ "paa min man bɛ te 'i -tɔ dre "fo "dɪ.

13 Wɪ nɛn e ci "le 'i yie 'trɔa "da "trilii 'vaa -e 'mɛn 'lɔdɪ 'e bɔ bɛ -nyrɛn 'gʊ: 'I Bali -le 'fluba ta vɪ Zozinɔn lɛ! En 'nyian 'wɪ 'bɔ nɛn Bali -a 'vɪ bɛ 'i -ci 'si -wɛ -e 'o "koe 'e 'tɔ 'o da! En 'nyian 'i Bali -le 'wɪ "paa o ji! 14 "Yi "nɛn Bali -a drɛ 'yie bɛ, te 'i -fɔla 'trɔɛn -sru "dɪ! "Yi zɪɛ Bali 'lewei vɪnɔn 'bɛ 'vɪ 'nan e ya 'yie vɛ -a, ɛn -leglizi min cejenun 'o 'pɛ 'pla 'i da.

15 Wɪnɪn zɪɛ -a drɛdɪ da nɛn 'i yie -trɔa, ɛn 'i 'fli -nɔn -yrɛ, 'dʊ -e minnɪn pɛɛnɔn 'o -tɔ 'nan 'yie ta wɔdɪ Bali -sru "bɛ e ya -kɪnan 'e 'lɛ. 16 'I yie 'tɔ 'i 'fli -va, ɛn 'i drɛ "yi 'yie 'wɪ "paadɪ va. Wɪnɪn nɛn maan 'vɪ 'yie paan bɛ, te 'i 'pɛ -sru 'e tɔa -a drɛdɪ -ji dɪ. Kɔɔ -te i ya -a drɛnan "da "bɛ, Bali 'i 'sia 'wɪ 'ji, 'ka 'vale minnɪn nɛn 'o "trɔɛn "a 'e 'tɔdɪ 'yie 'wɪ "paadɪ lɛ bɛ waa.

Zozinɔn 'wɪ dra 'o cin lɛ 'kɔ?

5 1-Te min ceje 'wɪ drɛ -wɪdɪ "bɛ, te 'i vɪ -yrɛ wei 'pleble 'a dɪ, 'pian 'wɪ nɛn e min "koe -tɔa 'e da bɛ, -a 'bɔ nɛn 'i vɪ -yrɛ "le 'i "tɪ "lɛ nɛn i ci 'wɪ tin 'banan. -Te -gobonun nɛn waa bɛ, 'wɪ -tɔwɪ zɪɛ -a 'bɔ nɛn 'i drɛ. 'I 'wɪ tin 'ba -wɛ "le 'i "bɔnɪn -le 'wɪ 'zʊ. 2-Te lumɔn cejenun nɛn waa bɛ, 'wɪ -tɔwɪ zɪɛ -a 'bɔ nɛn 'i drɛ. 'I 'wɪ tin 'ba -wɛ "le 'i "bɔnɪn -le 'wɪ 'zʊ. ɛn -te nɔnbɛnɪn nɛn waa bɛ, 'wɪ -tɔwɪ zɪɛ -a 'bɔ nɛn 'i drɛ. 'I 'wɪ tin 'ba -wɛ "le 'i "blɪnɪn -le 'wɪ 'zʊ, ɛn 'wɪ nɛn e 'tɔ "paa min man bɛ te -a -cin 'e 'kɔn 'i 'ji o va "fo "dɪ.

Lumɔnnɪn nɛn -cale a bɛ -wee 'wɪ nɛn 'gʊ

3 Lumɔnnɪn nɛn o -sran -ka 'o da ɛn 'wee -mie "ka "dɪɛ, 'i yie 'tɔ o da. 4 'Pian lumɔnnɪn nɛn o ya -cale -a, ɛn 'wee 'nɛnnɪn -a bɛ, -te bɛ "cɛɛ dɪ 'wee -anɔnmaannɪn a bɛ, 'wɪ nɛn 'kɔ 'nɛnnɪn zɪɛ 'o drɛ bɛ -nyrɛn 'gʊ. 'O 'wee yi -teradɪ Zozi da -ci -kɔɔn 'e tɛdɛ 'o 'bɔ 'mangulinun 'va. 'Wɪ nɛn e ci "le 'o drɛ 'o 'mangulinun lɛ bɛ, -nyrɛn zɪɛ. ɛn -yɛɛ 'sɔ Bali lɛ. 5 Lumɔn nɛn e ya -cale -a, -yee -mie "ka "dɪ, ɛn -a -pɛ -fɔnan "ka "dɪɛ, -a 'bli a Bali lɛ. Tɔ pɛɛnɔn man e ya Bali tru 'banan, te yaa laabo -yrɔ 'nan 'e 'pa 'e 'va. 6 'Pian lumɔn nɛn e ya -cale -a, ɛn -a 'bɔ ci 'sɔ wɪnɪn -sru 'nɛn e 'ta wo bɛ, -te -a yie a "man oo, Bali "le 'va bɛ, e ya min -kadɪ -a. 7 'Wɪ nɛn e ci "le 'i 'pla -wɛ 'wɪ 'a bɛ -nyrɛn zɪɛ. -Te o 'ta wɔla "da "bɛ, 'tɔ 'ka 'kɔan 'e 'padɪ o man dɪ. 8 'Nɛn nɛn ya'a 'e yie -tɔa 'e 'mangulinun va dɪɛ, te 'e 'pɛ 'si yi -teradɪ Zozi da -sru. 'Nɛn zɪɛ, e ya min -wɪdɪ "a, e "mlian min nɛn ya'a Bali -tɔa dɪɛ -a da. 'Nɛn nɛn -a mangulinun 'bɔ -nyɛanla -yee "kɔnnɛn, ɛn ya'a 'e yie -tɔa o va dɪɛ, -yee vɛ 'bɛ ci -wɪdɪ "fo.

9 Lumɔn nɛn -a -sran -ka 'e da bɛ, 'i 'tɔ 'sia 'fluba nɛn -calɛnɪn 'tɔ 'a -ji bɛ -a -ji. 'Pian lumɔn nɛn -a 'lɛ -fuba 'shɛɛdʊ -cia, ɛn e -kɔnnɛn 'pa 'e 'pa -a -tɔwɪ "bɛ, -a 'tɔ nɛn 'i 'sia. 10 -A 'tɔ "yi 'e 'kɔn min 'le -yee 'wɪ 'yɪnɪn nɛn yaa drɛ bɛ -a man. -A -mie nɛn "le 'nɛn 'lɛbɔdɪ sɪdɔ -le 'wɪ 'zʊ, ɛn -a -mie nɛn "le minnɪn nɛn o bɔala "va "bɛ o 'kɪndɪ 'e 'pɛ "fli "a -le 'wɪ 'zʊ, ɛn -a

-mie nen "le Zozinon nen o bɔala "va "be o cein -man "foedɔ -le 'wɪ 'zʊ, en -a -mie nen "le minnun nen o ya see -ji be, 'padɔ o va -le 'wɪ 'zʊ, 'lee 'wɪ "yi 'tɔ 'tʊdʊ pɛɛnɔn dredi.

¹¹Pian -te lumɔnnun zɛ o ya nɔnbɛnun -a be, te 'i 'o 'tɔ 'sia "fo "dɪ. Kɔɔ tʊ -mie bɔa "be, -kɔnnɛn -cin a o ji -le "wean, o "sia Crizi -sru, -e 'o -kɔnnɛn 'pa. ¹²Tɔɔn 'wɪ nɛn o -tɔ "da 'nan o dra be, te 'o 'pɛ 'si -a -sru. E ya "le tin nen waa -tɛ 'o 'fli da zɛ. ¹³En "nyian be 'o 'fli dra kɔannɔn 'a, te o -cia 'kɔn 'le "nen -tɔɔladɪ -a "da. 'Wɪ nen e cɪ -wɪlidɪ "fo "be, -nyren 'nan o 'le 'ble, en 'wɪ nɛn e 'ka 'wee 'wɪ 'a dɪɛ 'lee 'wɪ nɛn e 'ka "le 'e bɔla min le dɪɛ, -a 'bɔ nɛn waa ve. ¹⁴'Wɪnun pɛɛnɔn zɛ -yee "wean be, an ya "va 'nan lumɔnnun nen o ya nɔnbɛ "a en o -sran -ka be, 'o -kɔnnɛn 'pa, 'o 'nen 'ya, 'o yɛ 'tɔ 'wee "kɔnnɛn 'va, 'dʊ -e 'o vɪlɛ 'o -si -nɔn -kaa 'nanmanzan lɛ -e o 'tɔ 'e sɾɛ dɪ. ¹⁵Kɔɔ lumɔnnun zɛ o -mienun 'si -si tɔɔlɪ da, en o sɔɔnla Satan -sru 'va.

¹⁶Lumɔn nen e ya Zozi 'va en -cale lumɔnnun a -yee "kɔnnɛn "be, 'e 'pa o va. Te -leglizi nen 'e yɛ 'tɔ o va dɪ, 'dʊ -e -leglizi 'e -kɔla 'padɪ -a -cale tɔɔlunun va.

Minnun nen o o -tɔ -leglizi min ceje -a be -wee 'wɪ nɛn 'gʊ

¹⁷Minnun nen o o -tɔ -leglizi min ceje -a be, -te o yɛ -tɔa -leglizi -va 'kpa be, 'ka o muo 'fɔ -pɛ "kaga "ji. 'Pian minnun nen ka o muo -fɔa 'e "mlianla "da "be, minnun nen o Bali -le 'wɪ ve, en o Bali -le 'wɪ "paaman be o nen. ¹⁸Kɔɔ e ya 'e 'cɾɛn -tɛdɪ Bali -le 'fluba "ji 'nan:

«Tri nen e ya 'nyranman 'panan 'saa va be,
te 'i 'si -tɔ -yɾɔ -e 'e 'saa 'blɪ dɪ.»

En e ya 'e 'cɾɛn -tɛdɪ "nyian -ji 'nan:

«'Nyranman 'pazan be, -a 'pan a.»

¹⁹-Te o -leglizi min ceje -tʊ man wɪ 'vɪ 'yɛ, te ya'a 'sɪlɛ min "fli yaa 'le dɪɛ, te 'i 'sia "da "dɪ. ²⁰'Pian minnun nen 'o 'wɪ 'wɪlidɪ "dra be, 'i 'wɪ 'pla 'wɛlɛ Zozinon pɛɛnɔn yɛ man. 'I dɾɛ zɛ -e "klan 'e 'fɔ min -mienun ji.

²¹Kʊ ya Bali 'lɛ, en kʊ ya Zozi Crizi 'lɛ, en kʊ ya Bali -le 'pasianon nen laji e o 'si "va "be o 'lɛ. Maan ve 'yɛ 'nan, 'wɪ nɛn an "sia -a cɾɛn -tenan 'yɛ 'gʊɛ -a da nen 'i dɾɛla. -Te i min man wɪ 'man en yɪ'a tian -a san wei manle dɪɛ, te 'i tin -tɛ "da "dɪ. En te 'i min bʊ "va "dɪ.

²²Te 'i kɔɔ min -tɔdɪ -a 'nan -e 'e 'nyranman -tʊ 'pa -leglizi -ji dɪ! En 'wɪ zɛ -a -ji be, te 'i 'pɛ 'pla min da tada dɪ! Te 'i 'wɪ dɾɛ -e min pee -le 'wɪ 'wɪlidɪ 'yɪ 'e baa 'i man dɪ! En 'wɪ nɛn e 'tɔ "paa min man be, te 'i -tʊ dɾɛ "fo "dɪ!

²³Te 'i vɪ 'nan 'i 'fo 'yɪ 'saza 'mlɪndɪ man dɪ. 'Pian 'i man nen ya'a 'cɛan dɪɛ, 'lee 'i 'pɔn -ji -le "wean be, 'i -wen mɪn 'sɛzɛnɔn.

²⁴Min -mienun a be, 'wee 'wɪ 'wɪlidɪ "ta a 'e bɔladɪ min pɛɛnɔn lɛ 'wein 'vaa, -e yɪ nen Bali minnun -le tin "baa be 'e bɔ. 'Pian min -mienun -le ve

be, yi zɛ -a da nen -a ta bɔala. ²⁵-A -tɔwli "nen "nyian min dre wɔnun "yi "le vɛ -a. O ta a 'e bɔladɩ min pɛɛnɔn le 'wein. En 'be nen 'be 'ta 'ka tian bɔlea dɛ, yi zɛ -a da nen 'o 'ta bɔala.

Nɔannun -le 'wɩ nen 'gɔ

6 ¹Zozinɔn nen o ya nɔan -a be, 'o 'o 'tanɔn 'sia min -a -pɛ pɛɛnɔn 'ji. 'O dre zɛ, 'dɔ -e minnun 'o vɛle 'o 'wɩ 'wɩdɩ Bali 'lee -cee 'wɩ 'paadt man dɩ. ²En Zozinɔn nen o ya nɔan -a, te o tanɔn a Zozi 'va be, te o yie 'e 'ciɩ 'o 'tanɔn 'bɔ 'ji 'nan 'o 'vale waa 'o dre "bɔnɩn -a dɩ. 'Pian 'o 'nyranman 'pa -wɛle 'kpa tɩglɩ, kɔɔ o tanɔn 'bɔ nen o 'nyranman "paa -wɛle "be, o ya Zozi 'va en Bali o ye "yi.

'I dre "yi min -mienun a, te o Bali -le 'wɩ "paaman 'wɩu 'a

'Wɩnun pɛɛnɔn zɛ, -a 'bɔ nen 'i "paa Zozinɔn 'ji, en -a 'bɔ nen 'i 'pla -wɛle 'wɩ 'a. ³'Pian min -mienun a be, o 'ka 'wɩ zɛ 'be -sru "dɩ. 'Wɩ 'pee nen "o "paaman Zozinɔn 'ji. Wei nen e ya tɩglɩ en e "sia -kaa san Zozi Crizi 'le be, o 'ka 'be 'va dɩ. En 'wɩ "paadt nen e yi -tɛradɩ Bali da -ci "sia min le be, wa'a 'ta 'wɩla "da "dɩ. ⁴Minnun zɛ 'o 'fli "siala -dandan, te wa'a fe -tɔ tɔa dɩ. -Sa -fɔdɩ dre o man "le -ce -tɔ -zɔ, o 'wɩ 'blɩdɩ ye "yi 'wɩ "wɛnnɛnnun da. 'Wɩnun zɛ -yɛɛ -taala "man budɩ -a 'ka yei. En -yɛɛ -taala 'cɛndɩ 'e cin man -a 'ka yei. En -yɛɛ -taala min sɛɛ wɔdɩ -a 'ka yei. En -yɛɛ -taala ci "nrɔndɩ min man -wɩdɩ "a 'ka yei. ⁵En "nyian -yɛɛ -maan min yei 'ka -a ble dɩ. O 'wɩ dra "le minnun nen 'o 'wɩlo 'ka o da dɛ, -wee 'wɩ 'zɔ, en wa'a 'wɩ tɩglɩ 'tɔa "fo "dɩ. -A -cin a o ji 'nan Bali -sru 'ta wɔdɩ be "lala yɩnan nen.

⁶'Wɩ 'kpa nen, 'ta wɩladɩ Bali -sru "be, e ya fe yɩdɩ -dan tɔ -a. 'Pian min 'ka 'kɔan 'e 'ladɩ min lɔ fe da dɩ. ⁷Kɔɔ min 'ka 'talɛ 'e 'lɔ le fe -tɔ -a 'trɛ 'gɔɛ -a da dɩ. En min "ɛ vɩ 'nan 'e 'li 'e da be, ya'a 'ko 'e 'lɔ le fe -a dɩ. ⁸-Yee "wean -te -kaa -blɩfe ye, en -kaa man sɔ ye be, 'e bɔ -kaa a. ⁹'Pian minnun nen o ya "va 'nan o dra fɛnɔn 'a be, Satan o see "paaman -e 'o 'tɛ -yee san -ji. Min ci 'sɔ wɩ -wɩdɩnɩn nen, o ya 'wɩ "tun "a en o min sɛman be, te -a -cin a -tɔɔlanan "o ji. 'Wɩnun zɛ, -yɛɛ min -nan -nyaan, en -yɛɛ min 'sia Bali man -kɔɔbli.

¹⁰Fɛ nen maan ve zɛ -yɛɛ ci 'nan, "lala yɩdɩ "yi "be, -yɛɛ ci 'wɩ 'wɩdɩ 'tɔ 'tɔdɔ pɛɛnɔn pei -trɔanan "a. "Lala yɩdɩ "yi "le "wean, min -mienun 'si Bali -sru 'va, en o ya 'o yɩ yɩnan 'wɩ 'wɩdɩ 'tɔ 'tɔdɔ pɛɛnɔn 'lɔ.

Pɔl 'wɩ 'pla Timote le

¹¹'Pian 'i 'bɔ Bali -le 'nyranman 'pazan be, te 'wɩnun zɛ 'o -pli 'i man "fo "dɩ. 'I -wɛɛ 'nan, 'i 'wɩ nen 'e 'sɔdɩ "ji "be -a dra. 'I -wɛɛ 'nan, 'i 'fo 'i leadt Bali man. 'I -wɛɛ 'nan, 'i yi -tɛala Bali da. 'I -wɛɛ 'nan, 'i Bali ye "yi, en 'i min ye "yi. 'I -wɛɛ 'nan, 'i -pɔan 'e 'sɔ 'wɩ 'ji. En 'i -wɛɛ 'nan, 'i -kɔan "min -trɔɔ -a. ¹²'Ta wɔdɩ Bali -sru "nen yia -si 'sia be, 'i 'kun "man 'kpa, -e

'i wulo 'e bɔla "va. En 'belidɪ nɛn ya'a 'nyaan dɛ, 'i 'kun 'i 'pɛ "fli "a. Bali 'i laabu "man, ɛn i wu "man min "kaga yie man 'nan, Bali -sru "nɛn i ci. ¹³Bali nɛn e 'belidɪ -nɔan 'treda fɛ pɛɛnɔn lɛ bɛ, 'lee Zozi Crizi nɛn e wu "man Ponzɔ Pilati yie man 'nan, Bali -sru "nɛn 'e ci bɛ, an 'wɪ "paala 'yie o 'lɛ 'nan, ¹⁴'Nyrannan nɛn Bali 'bɔ -a -pɛba 'wɔ 'i 'lɔ bɛ, 'i yie 'tɔ "va. Te 'tɔ 'e 'pa "man "dɪ, ɛn te min 'e 'wɪ "man 'wɪdɪ "dɪ. 'I dre zɪɛ -trilii, -e tu nɛn -kaa san Zozi Crizi -taa "man "bɛ 'e bɔ. ¹⁵Tɔ zɪɛ Bali 'bɛ 'pla 'e 'bɔ 'a.

Bali zɪɛ -a va nɛn -fɛa pɛɛnɔn "sia,
 ɛn -yɛɛ fɛ pɛɛnɔn "paala 'e 'tuwli.
 -Yɛɛ ci mingɔnnɛnnun da mingɔnnɛn -a,
 ɛn -yɛɛ ci minsannun pɛɛnɔn da Minsan -a.

¹⁶En -yɛɛ 'ka 'kaa 'li "fo "dɪ.

En 'tɛ 'san nɛn min 'ka 'kɔlaman

-e 'e -pli "man "dɪɛ,

-a va nɛn e ci.

En Bali zɪɛ min 'ka tian 'li -a yulɛ 'e yie 'a dɪ,

ɛn min 'ka 'kɔlaman -a yɪdɪ -a dɪ.

'Tɔ 'wɪdɪ 'lee 'plɛblɛ nɛn -a 'leda "ka "dɪɛ,

'e 'kɔn -yɛɛ vɛ -a.

Amen!

¹⁷Minnun nɛn o ci fɛnɔn 'a tu 'gʊɛ -a -ji bɛ, 'i 'wɪ 'pla -wɛ. 'I vɪ -wɛ 'nan, te 'o 'fli 'sia -dandan dɪ! Kɔɔ fɛ yɪdɪ bɛ, cɛɛgʊ e ya 'yie vɛ -a, "trɛ e 'ka 'yie vɛ -a dɪ. -Yɛɛ "wean 'i vɪ -wɛ 'nan, te o 'bli 'e 'kɔn -yɛɛ "dɪ! 'Pian o 'bli 'e 'kɔn Bali nɛn e fɛ pɛɛnɔn -nɔan "min lɛ bɛ -yɛɛ. Yaa -nɔan 'e "mlianla "da 'nan -e -kaa ci 'e "nran. ¹⁸'I vɪ -wɛ 'nan, 'o 'wɪ "yi "dre, ɛn o dre wɪ "yinun nɛn 'e 'kɔn "kaga. 'I vɪ -wɛ 'nan fɛ 'e 'sʊ o man, ɛn 'o 'pa min va. ¹⁹'Wɛɛ vɪ 'nan 'o 'kɔn 'wɪnun zɪɛ -a dɛnɛn bɛ, e ya 'lɛ o yɪfɛ planan nɛn o ci tu -fɔla "da "ji vɛ -a. Zɪ o -taa 'belidɪ tɪglɪ 'kunlɛ 'o 'pɛ "fli "a zɪɛ.

²⁰Timote, 'wɪ pɛɛnɔn nɛn waa paa 'i 'ji bɛ, 'i yie 'trɔa "da. Minnun nɛn waa vɛ 'o 'fli man 'nan, 'o 'wɪnun -tɔa te 'bɛ a 'e -trɛ bɛ, te 'ka -kɔn waa -tuwli "dɪ! En te 'i 'fli wɔ -wee -sa -fɔdɪnun va dɪ! ²¹Zozinɔn -mienun o -pɛ 'si yi -teradɪ Zozi da -sru, ɛn o sɔɔnla -si zɪɛ -a da.

Bali -lɛ "yi 'e 'kɔn 'ka 'va.